

26. januar 2016

UPA 2016/37

Inatsisartut suleriaasianni § 33 naapertorlugu Naalakkersuisut peqquneqarnissaannik Inatsisartut aalajangiiffigisassaattut siunnersuut matumuuna imaattoq saqqummiuppara:

**Innarluutillit pisinnaatitaaffii pillugit Nunarsuarmioqatigiit isumaqatigiissutaasa nunatsinilu innarluutillit pisinnaatitaaffiisa tamakkiisumik illersorneqarsinnaasumillu atuutsinneqarnissaat anguniarlugu Naalakkersuisut kingusinnerpaamik 2017-imi Innarluutillit illersuisuannik pilersitseqqullugit Inatsisartut aalajangiiffigisassaattut siunnersuut.**

(Inatsisartunut ilaasortaq – Vivian Motzfeldt, Siumut)

**Tungavilersuut:**

Nunatsinni inuit innarluuteqartut innarluuteqalersimasullu atugaat tamatigut inuiaqatigiinni ersarissaavigineqarlutik minnerunngitsumillu atukkatigut paasineqarlutik ineriartoqataajuarnissaat suliaasaavoq pitsaasumik qularnaarisumillu tamatsinnit pisussaaffigalugu isumannaarneqartariaqartoq.

Innarluutillit innarluuteqalersimasullu atugaat sumi najugaqarneq apeqqutaalluni atugassarititaasut innarluutilittut ilaqutaasutullu assigiinneqqaat assigiingippallaarlutillu. Innarluutilinnut ilaqutaasut qanigisaasullu atugaat inatsillu innarluutilinnut ullumikkut piusut akornanni tamakkiisumik illersuinngitsumut atugassarititaasut imaanaanngitsuusut apeqquserneqarsinnaanngillat.

Inatsisartunut aaliangiiffigisassatut siunnersuutigisama siunertaraa isumaqarama tamakkiisumik innarluutillit inuiaqatigiinni ataqqinassusilimmik inooqataanerat ersarissaavigineqartuartariaqartoq ingerlaavartumillu pimoorunneqarluni malinnaaffiguarneqartariaqartoq.

Innarluutillit illersuisoqarlutik inooqataanerat malinnaaffigineqarpat inuiaqatigiinni innarluutillit inooqataaneranni sanngiffigisatsinnik takunnissinnaanerput pitsannorsarneqassaaq, taamaaliornikkuttaaq innarluutillit ilaqutaasalu ulluinnarni atugaat ilisimasallu pilersinneqarsimasut katersuuffeqalissapput kiisalu minnerunngitsumik Naalagaaffit Peqatigiit innarluutillit pisinnaatitaaffii pillugit isumaqatigiissutaat nunatsinni aamma atuutsinneqartup illersorneqarsinnaasumik ingerlatsiviunersoq ataavartumik nalilersuiffigineqartuarnissaa qulakkeerneqassaaq. Taamak oqaaseqarlunga qulequtaq pineqartoq Inatsisartunut saqqummiuppara.

**Namminersorlutik Oqartussanut pisortanullu aningaasatigut allaffissornikkullu kingunissai:**

Ingerlatsinermut aningaasartuutissat nutaat 4 mio.kr.-inut missigiunneqarput, soorlu meeqqat oqaaseqartartuannut aningaasartuutit taamaattut. 2017-imut aningaasanut inatsisikoorlugu aningaasaliissutigineqartariaqartut.

**Namminersorlutik inuussutissartunut aningaasatigut allaffissornikkullu kingunissai:**  
Soqanngilaq

**Inunnut ataasiakkaanut aningaasatigut allaffissornikkullu kingunissai:**  
Soqanngilaq